

申報

東洋請討臺灣生番論

閱西字日報六月二十日京師來信云現聞中國將擬出師壓服臺灣生番之悍使後有船壞被難者務須撫卹不得仍肆其野性也且聞是師也命李伯相督發師及臺灣先將數月以前殘殺琉球被難水手之各生番從嚴辦罪然後使各生番皆一例歸服中國之教化焉前月初六日本館已詳譯東洋西字新報述及該番烹食東洋所屬之琉球遺難諸人必欲中國設法為之報讐且言中國不任此役伊將決意自行報復今東洋使臣甫由京師歸國中國聞有此舉想必由伊定議所致西報亦揣測之言向未知其確否夫臺灣之番向分生熟二種熟番久已臣服已有登仕籍列庠序者生番至今未服王化自為種類大約射獵為生殘忍殺戮是其天性慘厥為與野獸等朝廷因其不知教化是以置之度外不令與熟番同處故雖同在臺灣而實則屬化外今之烹食人者必係生番無疑若熟番則斷無是事孟子有言獸相食人且惡之諺云兔死狐悲物傷其類今生番烹人而食其居心行事殆禽獸之不如即令聚其醜類而殲滅之亦不過多殺禽獸而已又何足惜宜乎東洋見其舉動猖獗戰世聽聞故欲中國大加懲創使烹人各犯一律伏法庶幾可為異日之警戒然東洋祇知臺灣之地係屬中國而不知臺灣之番尚有生熟之別彼以為地為中國之地人即為中國之人倘伊徑自興兵問罪又恐有礙中國故再三請中國自行查辦即旁觀者而論亦謂中國之境亦不宜使東洋加兵固也然生番之於中國未歸順者也一旦因其烹食琉球之人遣官往辦彼安肯帖伏以聽哉將見理論之不可勢禁之俱窮惟有用兵而已夫中國今日用兵之法較之昔日當有把握矣乘西法之兵船用西法之槍礮擅西法之兵勇自當戰無不勝攻無不克所患者有損于糧餉也夫有損亦有益也昔以無事而未試用夫西法不知學習之果否能精今以小事而先操演夫西法可知則效之是否能速能知己之所不逮更求人之所以精將見以少勝多今日能練之數千人即可當舊制額設之數萬兵也倘後遇有大事推而廣之而已又況造有輪船其運載軍需之費亦較輕易斷不至器用不足而中止雖然生番雖野亦不可視之太輕彼雖行軍無法器械不精然天生金山幽渺難測彼且恃為巢穴出入無常表裏為奸以成負隅之勢吾故曰生番亦不可輕之也